

四庫全書

集部

欽定四庫全書

集部

石倉歷代詩選卷三百六十七

詳校官編修臣謝振定

侍讀臣孫球覆勘

總校官進士臣朱鈺

校對官編修臣郭晉

謄錄監生臣李傳燮

欽定四庫全書

石倉歷代詩選卷三百六十七

明 曹學佺 編

明詩次集一

薛瑄

宿信陽慈氏寺有懷趙侍御

禪室絕清灑
夜景何寥寥
白日墮簷隙
涼颼拂林梢
有客不能寐
起坐心勞焦
所懷同心友
相去一何遙
開門

望天宇露冷河漢高恨無雙羽翰奮飛共遊遨秉燭遂
至旦詩成還獨謠

其二

山寺月皎皎流光入簾帷神清不成寐起視夜何其天
漢漸回轉參斗亦西移庭草泣繁露林竹生涼颼撫景
念良友渺在天一涯會面曾幾日成此遠別離冉冉易
寒暑悠悠隔山陂豈無他人好中情詎能知

舟中作

少小心好奇斯遊歲方壯雲帆拂遙天畫舫壓高浪青
山歷歷過可見不可傍晚泊洞庭湖還當極遐望

龍陽山行過雨

楚山饒古木楚水饒竒石林霏暗不開石瀨瀉何急久
行路欲迷嵐雨互蒸濕陟降童僕勞竟日未遑息向晚
落葉多攪轡更駐立

瀟湘八景

雨來萬壑昏雨過千岫出晴旭楚人家蛾眉畫生綠望

望如有情餘光遠相逐

右山市晴嵐

西風淨晚煙天水遠相接瓊樓玉宇深炯炯涵虛白夜

久風露寒一鼓湘靈瑟

右洞庭秋月

霜清秋水落風過人迹平飛飛隨陽鳥相呼下寒汀向

夕聚儔侶月映蘆花明

右平沙落雁

夕照下山門清音出煙霧暝壑一僧還側竹尋歸路月

上楚天寒霜落洞庭樹

右煙寺晚鐘

兩岬叢篁濕向夕波浪生孤燈借漁火江雨蓬背鳴南

來北往客同聽不同情

右瀟湘夜雨

落落漁樵家蒼蒼起煙霧岼滑移釣舟沙平失歸路似

有凌波人盈盈月中去

右江村暮雪

釣艇收晚曾歸鴉集疎柳天風吹彤霞明月映江口孤

村一笛橫萬慮復何有

右漁汀落照

翩翩投極浦漠漠背殘照水柵歌竹枝清風激幽調歸

舟漸覺稀錯莫尚凝眺

右遠浦歸帆

泊舟貽溪宿陽樓山下

泊舟清江許肩輿渡迴溪微逕入叢篠蒙籠行欲迷轉
步忽開曠溪田間高卑傍水野航小連林茅屋低適遂
情景豁寧覺人俗非山堂稍曛黑冥冥子規啼

又

窈窕入清溪側逕何紆曲魚梁截奔流雪瀨漱寒玉空
翠濕人衣霧雨滿新竹路窮上野航前登得平陸日暮
煙火迷似向桃源宿

湘江舟中

湛湛湘水綠夾岼叢篁多挽舟逆水上南風起微波嘉
此晴霄景逍遙翫江沱沙渚曠緬邈雲岫紛嵯峨遠目
為舒暢客意將如何濯纓吾所愛聊為扣舷歌

襄陽道中

曉辭新野縣午入襄陽境迢遞岡坂長曲折溪流靜入
村竹青青便覺異風景惟時霜雪繁歲晏北風冷中私
且撥捐壯觀極馳騁日暮臨漢江窮源思方永

遊習家池

谷口一逕入蒼山四際開中有習池水澄碧無纖埃泉
源初噴薄交流遂濛洄飛鳥鏡中度行雲天外來微風
一蕩拂林影久徘徊寒光怡心性俯翫何悠哉愛此不
能去載歌寫中懷

遊君山寺

為愛湖中山艤舟山下路石磴純莓苔青林雜煙霧前
行如有窮嵐嶺乍分布招提壓重湖千里周一顧孤峰
四無垠形氣自依附蘭若轉幽邃山僧引徐步白雲簷

外生清風竹間度
庭花雜無名
歲晏色猶故
澄心得妙
觀忘言
竟良晤
愛此林壑
清遂薄塵俗
務招隱有同調
奚待畢婚娶

雨後臨雙池

時雨夜來歇
雙沼朝欲平
香草何瑣雜
芊蔚繞岬生
修竹瀉風露
團荷貼青萍
顧此好修容
覽彼衆物榮
徘徊撫雕檻
徒倚當素屏
採掇終有贈
緬焉起深情

新笋

方池錦萍滿花草被四阿生意一何盛新笋池上多綠
苔已穿透粉籜方包羅銳若毛遂穎森如羽林戈朝翫
夕逾峻舊竹時復過相期保堅節歲寒心靡他

渡雙溪

雙溪始合流崖渚遂經復洄潭一鏡平秋影空寒綠野
渡得孤航山家帶喬木適意方自茲前呵戒僮僕撫景
重悠然誰能和斯曲

秋日雜詠

翻翻高荷葉秋雨生微涼豈不懷遠道撫時坐空堂何
以為我歡簡冊多遺芳古人不可作古道寧可忘茲理
將無厭欲語隨渺茫安得忘言子相與傾一觴

夜坐

銀燭一寸光照我千古心事諒誰語秉筆空沈吟幽
懷載草草妙思彌惛惛豈無揚子雲視昔猶視今

送人之蜀

岷江瀉東溟岷山倚西極江山古名秀楊君將此適秋

風送征帆夜火明水驛相憶瑤華音看取東飛翼

冬夜懷魏希文

冬夜氣何厲冰雪輝前楹單居不能寐懷我舊友生行
雲去不息賓鴻各時征兩情曠難合欲語誰當聽惟有
寒月光見余心宇清晨轉遂至旦遠思徒營營

遊禹門

春澤周四野閒情樂時和出郊縱逸興緬懷古山河禹門忽
在望峭壁雲嵯峨石磴連飛棧相架接澄波空山響絲竹虛

堂進舞歌父老誠苦心旨酒神所呵由來非一朝吾意其如何

擬古

悠悠復悠悠
水中有行舟
四序無淹息
代謝不可留
春鳥寂無聲
寒蟬號素秋
落葉滿阡陌
白雲散巖幽
去去勿復道
潁陽有遺老

其二

庭前桂花發
清香散涼颼
采采黃金英
傾筐方自持
思欲贈遠人
風波阻長歧
望望不可及
馨潔空自奇

其三

圓象無停運大化不可留
征車既西邁行舟復東流
轍迹苦相背兩美焉得由
青松生澗底白日麗高丘
餘光不迴照直幹空蕭颯
去去莫復道零露滿春草

其四

在陰鶴相應遷喬鳥當歌
琴書滿瑤席良朋亦已多
各愛芳菲時共惜光陰過
齋心何所求所求保太和
壯年不努力奈此老大何

其五

白雲在高丘綠蘿在深谷中有冥栖士雲蘿蔽茆屋獨
抱尚友情緬遂碩人軸古琴時復彈古書還更讀逍遙
無外事俯仰長自足沮溺耦而耕姜叟釣渭曲伊人豈
無心耻銜荆山玉將須鳳來儀朝陽滿梧竹

其六

青山何岌岌白雲自超超雲山日在望開門兩相高既
喜山靜止還愛雲飄飄秀色可攬結吾其陟山椒

其七

庭樹微飄落涼氣始披拂却憶少年時泛舟湖湘曲秋
風起波瀾寒霜下林麓日出江上楓霧隱楚岫竹蘭芷
亦蕭條芰荷不秋馥靈均舊遊處騷思方滿目忽忽三
十年涼意復相觸九歌有遺辭得意在雲谷

江行

石城上朝旭宿霧漸已收大江何茫茫柔櫓泛中流鍾
阜猶在望白雲散巖幽兩載寧無情湖山憶同遊佳勝

邈難即迴想悠悠

其二

我舟既云邁長風起層波天水共渺茫雲岫紛嵯峨石
城猶在望赤岨還經過遠堤秋樹小水國蒹葭多老遂
金陵遊奈此佳麗何北歸已陳迹江行遂成歌

清河晚晴

向夕起長風秋雲靜天宇清波流月光白露下寒渚榜
人喜晴霽理楫夜相語早發過鍾吾漫漫見徐土

杜鵑行

昔讀古人書知有杜鵑名今泛沅江船始聞杜鵑聲杜
鵑有子不自哺野老相傳之語如少陵惟有古來稱望
帝變化無端竟茫昧吾意百鳥相推尊亦如蜂蟻君臣
義氣化感物不自由四月五月聲喧啾一聲未了聲轉
急千林萬壑波濤秋遠客扁舟睡難着兩耳還遭杜鵑
聒歸心一夜在虞廷鳴鳳時應集阿閣

壺頭歌

沅水南來幾千里亂石激濤蹴空起急捎官舫上巉巖
閒倚驛樓看山水隔江萬疊雲峰稠一峰平立名壺頭
云是伏波駐兵處至今石室留山陬憶昔炎網斷如縷
草竊紛然據寰宇寧知田牧隱竒才揮斥奸庸識真主
西征聚米在目中南伐誰比銅柱功中興諸將數籌略
直與賈鄧爭豪雄老身甘向邊陲歿誓掃羣蠻靜坤軸
壺頭一死非無情天遣英靈鎮南服昔于青史歎高識
今向荒山訪遺跡怒濤猶帶薄伐聲愁雲似是忠憤積

馬侯馬侯真丈夫大器自與凡材殊廟食勲名幾千古
媿我章句為腐儒

昆陽行

策馬從北來南涉沙河渡登岍得平原極目風景暮暮
天落葉何縱橫翻翻亂觸馬足鳴蒼山無數背人遠瞻
前忽及昆陽城城南澁水流城郭英雄事業猶如昨白
水真人在側微謹厚豈使常情度是時炎運寒如灰五
威使者車奔雷慘慘三精雲霧塞瀟瀟九縣颶風回真

人一怒奮神武手握赤符興義旅昆陽大戰開天功烏
合如林散何許吾想當日殺戮多洗兵雷雨何滂沱
川倒流虎豹伏亂麻屍積山嵯峨自爾威聲震天地
魁惡黨魂飄逝夏后周宣果再興成功磊落光前世
悠此事千餘年至今父老猶相傳我來正值太平日
戰地盡作桑麻田生平遊覽好奇特徘徊弔古中腸熱
舉鞭一笑寒天高萬里關河坐超越

黔陽江行歌

黔江轉急勢未已兩岼蒼崖削天起官船雙櫓疾於飛
倏忽雲林過百里生平膽氣尤崛竒三年蠻徼甘奔馳
惡灘險浪不經意白日自保公無私空囊敝篋一何有
滿束古書置前後船窗豁達涵虛明書中得意寧容口
忽憶江山千古長不知何日開鴻龐陰陽爭勝鬼神急
造化不停真宰忙十竒百怪氣參錯輕飄重墜奠清濁
三光宣精四海明五行順序百卉作有物不名復不凋
泯滅萬化常超超眼底江山未為壯大地比是猶毫毛

感此人生浪自苦萬事悠悠隨所與
放歌一曲南風來
坐對青天兩無語

齊都歌

偶把漁竿來渭水諸侯八百從如蟻
洗兵一雨天下清
興王事業應難比茅土之封東諸侯
奄有青濟都營丘
千乘龍旂照滄海百層雉堞臨淄流
淄流梯曙歌鐘起
人物喧闐溢都市黃金白壁酬君公文
馬雕軒覲天子
前朝後市何輝光歌臺舞榭遙相望
長劔危冠盛臯虎

珠簾繡幕圍姬姜伯業相傳僅千載寧知時去繁華改
盜賊公然竊寶弓坐令清社無光彩是非得失俱悠哉
空餘廢址連荒臺往事淒涼不可問溜流嗚咽悲風來

望海歌

我生足迹半天下竭來持節臨東夏萬里滄溟入壯觀
洞庭彭蠡足驚詫三韓之西日本東玄冥少昊迴祝融
歸墟尾閭杳難測清江碧漢來無窮碣石依稀望中小
天台不斷連山繞煙波明滅散羣鷗雲水空清浮衆島

扶桑漸覺明朝暎，還從海底昇金盆。
太陰滅盡清輝發，羲和隱駕波無痕。
有時颼母逞神威，馮夷擊鼓百怪舞。
白浪峨峨摧雪山，黑霧茫茫漲天宇。
三山六鼇安在哉，祖龍已去劉郎來。
樓船不復返秦使，雲帆更欲尋蓬萊。
雄豪千古俱淪沒，惟有潮聲尚如昨。
從誰海上論盈虛，獨倚蒼山看寥廓。

寄題廣漢張魏公讀書巖

廣漢之山甲西蜀，聞有石巖在山麓。
想當英傑未遇時，

携書獨向巖間讀巖間日月閒且長遠從虞夏窺黃唐
幽探造化鬼神變明察典禮人道常古書徧讀飽經濟
一朝適與風雲際社稷傾將赤手扶砥柱不逐洪波逝
燕雲鉦鼓震乾坤冥冥九宇皆兵氛要將魑魅除君側
誓驅貔虎恢中原其如讒口增萋斐一斥南荒垂二紀
容光雖荷天開明孤忠竟與時已矣俯仰于今幾萬秋
名將江漢無停流思公招公公不起遙想寒巖添我愁

郊遊

客居煩聒毒我腸
偶騎款段登周行
西行三里渡小水
北上百步臨高岡
遠近人家翳喬木
依稀郵舍圍垂楊
是時隴麥半乾槁
南風起浪日色黃
所遇林桑已空兀
誰家婦女猶提筐
維南有山接嵩少
雲門開闔峰低昂
清回爽氣徹心目
便覺塵慮都消忘
回鞭窈窕歷溪谷
野花野草供幽香
殼蝸埵蟻各生遂
潛鱗飛鳥咸徜徉
東折縈紆歷平坂
縱觀大化窮毫芒
乃悟羣生隱無極
始知一氣包鴻荒
此意悠悠真罕識
令人酷憶點也狂

金少已入八十一
卷三十七
緩轡歸來日已夕滿懷風月天茫茫

洞庭遇雨

孤舟行何遲歲晚洞庭雨跳波亂明珠隨風颺細縷雲
霧失君山波浪連吳楚誰唱斑竹枝別思盈南浦

久雨遣懷

客居連市井積雨竟朝昏屋漏頻移榻泥深少出門窗
風侵坐冷簷溜入宵繁賴有詩驅悶無勞問酒樽

其二

秋來常苦雨風氣早生寒
小鳥投林急高鴻下食難
奔流淹古道密霧隱前山
試誦停雲句中懷獨未寬

舟發城陵磯

急鼓催舟發依稀見岳陽
遠波浮島嶼衆水合岷湘
竹瓦居人閣杉牌賈客房
且看風景異未覺遠遊傷

舟發長沙

曉溯湘江水微風漾碧波
好山隨岼遠野燒入林多
往哲題詩處今予鼓棹過
年來遊覽數天意遣吟哦

其二

已覺長沙北猶瞻嶽麓西
天浮湘水濶樹入楚山低
岍芷餘香草叢篁染舊啼
昔賢遊覽地我亦為留題

其三

長沙城下驛解纜發扁舟
水柵千家市沙村十里洲
喜逢晴霽景况值太平秋
憲節叨光寵懷賢獨未休

湘鄉道中

湘鄉南去路連日是山行地僻溪潭綠
冬和草樹榮野

人懸稻把古戍列干旌異俗今如此歸當話友生

沅州新正書景

頗訝沅州地新正景不同遠山青草瘴深院落梅風角
角尋巢鳥喧喧采藥蜂春衣初試袂和氣滿簾櫳

其二

楚地春來早羣花次第開輕黃舒柳線重碧染莓苔永
日香凝篆和風酒滿杯端居叨寵渥何以答涓埃

喬口遡流往長沙

楚岫無邊翠湘流不盡清香風屈子賦苦竹鷓鴣聲風
景當年事雲霞萬古情沙頭舊鷗鳥誰肯與尋盟

武口守風

連日北風疾江濤拍岸鳴天垂平野月浪颭近船燈湖
與歸心濶秋因客思清不眠聽鼓角高枕念王程

其二

武口叢祠下維舟日欲晡北風增駭浪南客念歸途水
遠浮三蜀煙濃暗五湖江村秋雨裏難覓酒家壚

舟中偶成

舟中如斗室坐似覺心清閉戶嫌風冷推篷愛日明偶
思前世事因見古人情自顧知何益詩書浪得名

漢江曉泛

城下扁舟發江清宿霧消竹村迎岼出粉堞背人遙神
女無消息明珠久寂寥鹿門看漸近滿耳颯清飈

舟中遣悶

五日行不盡洞庭青草寬窮陰連旦夕密霧隱湖山詩

思自難竭酒壺行復乾孤舟親愛遠何以暫為歡

武陵曉泛

今朝風日好來泛武陵溪碧水寒依岼蒼林遠護堤沙
光搖野馬人語散鳧鷖二月桃花發還應處處迷

送和司訓

秋色滿平陰秋聲幾處砧離筵對衰草別路繞疎林白
日青霄迴紅雲紫極深此行應得意早晚報佳音

黔江

好在黔中地相留過幾年
岍經冬嶺樹水宿夜灘船
支枕思前事清心憶往賢
一陽看漸近吾道故應旋

題風木卷

秋色滿天地寸心將若何
行雲寧返迹逝水絕回波
斷織封蛛網殘篇掩蓼莪
空餘東嶺樹向夕受風多

中秋夜諸生持酒至

五見中秋節湘南想北州
忽看今夜月忘却昔年愁
汾水通河漢龍門近斗牛
霜鐘傳永夕高詠未能休

示弟塘

大屋星霜久新年雨雪頻
田園知己薄生計可忘勤
喬木宜思祖雞豚莫惱鄰
東堂花幾樹應與歲俱春

嘉陵泛江

湛湛嘉陵水沈沈石底明
岼翻雲樹影谷響棹歌聲
微冷南風細輕陰暮雨晴
應難逢此景還慰遠遊情

雨後宿嘉陵

夜宿嘉陵岼扁舟雨不休
山雲迷澗壑林火射江流
久

坐思王事難眠動旅愁所期氛祲掃走馬上神州

錦城寓館

寓館富花竹書齋夏日長芭蕉紅錦秀梔子白花香樹
密寧知暑窗開但覺涼遠懷雖暫遣世慮未能忘

其二

曲徑通幽處交陰翠竹高書齋成雅趣花圃愜遊遨石
甃涵天影風林作海濤寧知城市內清境勝江臯

竹

誰種庭前竹蕭森數十年高簷晴落翠虛室晝生寒韻
喜風前聽陰宜月下看莫言家在遠長得報平安

竹下

翠擁如雲竹門開一徑深成林常少日接葉自多陰山
鳥時聞嚙風蟬忽聽吟把書閒讀處涼籟覺心清

遣懷

如何三月外猶未得家書為少南來雁因稀北上魚謾
叨新使節祇想舊田廬旦夕聞消息中懷暫一舒

五丁峽

巨峽二千里天開幾萬年
泉飛林杪雨雲合管中天
一水橋頻度層崖石亂懸
梁州神禹迹繆以五丁傳

入徐州境

春首及徐方行來道路長
殘冰餘積水霽雪帶連岡
遠岍通淮向懸流近呂梁
征鞍今可解不日上舟航

古滕薛城

纔過古滕國還瞻舊薛城
分封遺壞堞列爵但虛名
冉冉

冉春煙淡悠悠野水清望中今古意信馬獨含情

江道士碧岩軒

飛閣環流水層軒面面開虛澄涵倒影淨碧絕浮埃鏡
裏閒雲度潭心爽氣來道人能有此還似小蓬萊

樵雲野老

自得山中趣都忘世上名閒尋肥遯侶共作斫雲行決
決溪流響丁丁谷應聲偶然值漁者問答有深情

曉登沅州北上頂

嵐靄氤氳重溪行咫尺迷漸登層巘上始覺衆山低遠
近天無際參差樹不齊川雲平似海石磴峻如梯日出
寒煙外風生碧澗倪異禽和露宿快馬度風嘶遠目回
三蜀高懷徧五溪歸朝誇勝際沅水有新題

戲題紅白二梅花落

簷外雙梅樹庭前昨夜風新英兼舊蕊墜粉間飄紅已
見苔成錦方疑色是空粧娥初點額舞女欲迷蹤雨重
胭脂濕泥香瑞雪融不知何處笛併起一聲中

簡孔別駕遊禹門用謝太守韻

雙旌曾向禹門遊，別駕今來亦暫留。
岼斷雲霞開翠壁，天連棧閣駕黃流。
千金尚想波心瓠，萬斛深期渡口舟。
如此山川元不惡，可無詩句記春秋。

讀文山傳

朔氣蕭森歲向深，揮戈杖淚動哀吟。
艱危已竭回天力，慷慨猶存捧日心。
海水尋常秋月冷，塞雲千里暮星沈。
悠悠往事都如夢，只有孤忠照古今。

登南城

土阜層層數百盤
偶來高頂望人寰
滿川宿麥浮青浪
一帶晴嵐列翠鬟
何處雲霞迷磧石
數村桑柘遶綿山
唐風晉問憑誰說
地潤天高雁影寒

曲沃道中

新秋雨霽過新田
綠樹人家斷復連
汾澮波光晴泛日
絳州山色曉參天
申生大孝留天地
里克遺名載簡編
何事齊姜墳上土
忍將芳草度流年

滎陽詠古

楚漢干戈向已休尚存遺迹在中州
幾灣流水風煙暮一片荒城草樹秋
力戰可堪離廣武分疆空見指鴻溝
當時四百興劉計只在張良一運籌

宿水村

日暮江頭送客還寂寥清夜不成歡
連天海氣當窗白一枕江風入夢寒
雞鳴遠村皆落月潮生古渡已層瀾
披衣久坐待明發白石歌餘興未闌

春日遣興

靄靄春雲度女牆
萋萋春草徧芳塘
園林風景非吾土
庭館鶯花是異鄉
野岼波紋浮鴨綠
官橋柳色弄鶯黃
不知多少相思意
祇逐遊絲百尺長

秋日寄王嘉靖

漁陽秋色動關河
遼右天晴一雁過
白社高人渾懶漫
青氈學士久蹉跎
西風對酒砧聲切
良夜調琴月影多
珍重遠書勞問訊
相思千里奈情何

九日和徐懷玉韻

對酒東籬自詠詩
遠山晴望轉逶迤
秋容淡薄黃花節
風景蕭條白雁時
醉閱人寰聊縱目
靜思塵事久支頤
年年此日無窮意
笑把茱萸欲贈誰

早秋

露下梧桐一葉飛
早秋涼氣襲人衣
西風樹老蟬聲急
夜月涼深燕影稀
鸞鏡每看新事業
龍泉頻拭舊光輝
黃花晚景真堪賞
九辯何須怨夕暉

七夕雨

天孫不乞人間巧故使秋雲蔽月輝
銀漢晚煙迷鶴馭
玉霄涼雨濺鮫衣更無絲結看蛛縱
祇想橋成有鵲飛
獨立秋風倍惆悵通津何處問支機

春日懷舊遊簡胥貢士

薊門春色阻關河汴野東風長綠莎
正是懷人煙景暮
不禁呼酒雨聲多閒中謾寫凌雲賦
醉裏誰聽白雪歌
惟有流鶯相厚意柳溪花徑數來過

送馬太守之西安

玉階新拜寵恩濃
皂蓋西行五馬逢
秦樹到關開曉色
岳蓮當路出奇峰
好詢民隱周三輔
為播仁風答九重
青史古稱張趙蹟
會看勲業繼前蹤

登中條山東頭

魏國中條此盡頭
登臨暇日興悠悠
兩崖勢轉黃流靜
萬壑聲寒碧樹秋
官舍飛甍臨遠谷
禪宮細路遶層丘
風光滿目皆吾土
逸氣飄然總勝遊

薊門煙樹

石門相對一川平
嘉樹依依接鳳城
密繞溪村雲未斂
半遮山寺雨初晴
歸鴉向夕穿新綠
嬌鳥啼春護落英
試向高原凝望處
祇疑韋偃畫初成

金臺夕照

千年玄社已消沈
尚有荒臺僅數尋
壞埒只今生翠蘚
頽垣不復貯黃金
山銜落日留殘照
樹擁孤雲帶夕陰
駿馬無聲衰草合
冷風涼月暮蟲吟

登岳陽樓

玉斧飛霜過洞庭岳陽樓上寄高情天涯楚樹千行直
湖面君山一點晴今古留題才浩渺往來登覽歲崢嶸
中天徙倚無塵到笑挹高風滿抱清

辰陽秋日

雄城百雉控蠻荒山翠高低護女牆萬里梯航通六詔
五溪煙水下三湘邊氓久已漸華俗遠客頻應望帝鄉
地氣于今同北土早秋時節雨生涼

益陽詠古

潯水西來遠縣流
煙波遠接洞庭秋
津頭客舫半江貨
岫畔人家多竹樓
甘壘草荒秋月淡
裴亭樹老暮煙稠
浮江仙子何須問
我亦當年賦遠遊

長沙

明時持節按湖南
澤國風煙到自諳
客舫盡應依水市
人家多是住山嵐
三苗已見華風遠
五嶺應知聖澤覃
廊廟只今登俊彥
不勞詞賦弔湘潭

襄陽懷古

鄧城纔過見樊城
雉堞荒涼總舊名
廢沼幾行寒雁下
疎林千點晚鴉鳴
分茅尚自懷山甫
謀國何須羨曼甥
更問襄陽千古事
峴山依舊漢江清

沅州雜詠

遠山重疊繞孤城
城下蠻江一曲清
溪峒人家猶異俗
市廛兒女帶華聲
戶將烏鬼為生計
地產丹砂當歲征
自昔黔中風土惡
遠遊那得易為情

樓上

都門樓閣倚中天
暇日登臨思渺然
樹繞西山濃着雨
地連東海淡浮煙
塵消綺陌填車馬
香煖歌臺醉管絃
獨有道人清似鶴
謾從華表記歸年

遊靈巖寺

靈巖有路入煙霞
臺殿高低釋子家
風滿迴廊飄墜葉
水流雙澗泛空花
青松閱世風霜古
翠石題名歲月賒
誰謂無生真可學
山中亦自有年華

送盧都憲鎮守寧夏

明時出鎮得才難，莫厭巡行萬里間。
雨露初辭青鎖闥，風霜先到賀蘭山。
關河控帶黃塵靜，蕃落耕耘綠野閒。
入覲天顏應咫尺，不須頻看寶刀環。

溫泉

唐家天子愛溫泉，故起離宮繡嶺前。
山上朝元金作閣，苑中湯井玉為蓮。
錦鳧曾泛當時水，香木空聞舊日船。
賜浴未終鼙鼓動，苔痕留恨自年年。

春日遣興

閒館春深日正長
萋萋春草徧池塘
淡雲疎雨梨花白
暖日輕風柳線黃
讀易自能窮宇宙
賦詩聊爾記年光
錦城風景雖云樂
故里關心未可忘

錦江驛官送櫻桃

錦官驛吏送櫻桃
紅顆堆盤磊落高
時果已知西蜀美
古詩難見少陵豪
嘗新暫遣中情悅
感物還添遠意勞
多少上林鶯啄徧
一春歸興正滔滔

華清宮

天寶承平奈樂何華清宮殿鬱嵯峨朝元閣峻臨秦嶺
羯鼓樓高俯渭河玉笛長飄雲外曲霓裳間舞月中歌
祇今惟有溫泉水嗚咽聲中感怨多

諸葛武侯塚

丞相孤墳此地尋襄城西去漢江陰青蕪漠漠煙橫野
翠栢蕭蕭風滿林尚憶出師當日表空歌梁甫舊時吟
中原未復星先墜長使英雄慨古今

金陵春望

金陵最好是新春風景無邊入望頻山似洛中浮秀色
水從天上泛通津千門垂柳初經雨滿路飛花不起塵
深荷發生同萬物兩京回首憶楓宸

簡張都憲楊尚書鄭侍郎廖少卿丁寺丞

棘寺秋官接憲臺山光水色畫圖開青林雲氣當窗見
翠浪風煙入座來楊柳影中冠蓋過芰荷香外吏人回
好生正仰吾皇德共播仁恩徧九垓

過武功縣

持節西來過武功扶桑日上曉光紅渭河水遠波聲小
太白山高樹影重遺址已無慈德寺居人猶說古郃封
東行無限前朝事盡在紅塵綠野中

河間獻王墓

漢家宗室最稱賢遺事曾經閱簡編偶過河間尋往迹
空餘荒塚帶寒煙頻求千古書連帙獨對三雍策幾篇
雅樂未興人已逝歌聲惟有大風傳

鳳臺春曉

金陵千尺鳳皇臺
臺上春雲向曉開
綠草雨餘淮甸合
青山岼轉楚江迴
謫仙此日知何在
麗句當年未易裁
定鼎只今逢有道
九苞行復自天來

天順元年六月初十日上章堅請告老至二十

一日蒙允出京師舟中賦

經世誰人志盡酬
古今回想興悠悠
即非有道身能退
自是無才老便休
歸騎遠尋天井路
輕裝先放潞河舟

家山是處知何日汾水西風八月秋

山行二首

山鳥多清音山花有異香但得山間趣寧辭山路長
荒岡斷復連風葉散還集霜落秋澗清煙橫晚岫碧

秋夜

冷冷碧窗風皎皎疎簾月重門掩秋霜素練擣寒雪

荒逕

曉行荒逕中灤灤草上露日出雲氣收一鳥空中度

早起

鷄鳴耿不寐展轉待明發童子視窗前猶言有殘月

早發

晨星耿孤色曉月餘清朗舟人解纜行夢覺波聲響

銅雀臺

銅雀臺高春日明春風無限綺羅情笙歌莫向西陵奏
松柏蕭蕭起暮聲

舟中雜興東韓克和劉自牧王尚文諸公

金少卿八十一
卷三百六十七
天上同霑雨露多
扁舟又喜泛滄波
冥冥鳥背夕陽暮
千里月明聞棹歌

其二

波光到底見星辰
中夜行舟月色新
睡覺水村雞已唱
雲帆清曉過天津

其三

夾堤楊柳綠依依
傍水人家籬落稀
小婦携籃賣蒲笋
得錢含笑入荆扉

其四

水畔人家舟作屋飄飄身世長
兒孫幾回睡足蘆花月
又引帆檣過別村

田蓼子谷取捷路抵鞏黃河北徒有感

此路經過已十年
重來河水變桑田
西風不盡登臨意
又見寒鴉下夕煙

鞏洛道中

嵩高雲氣晚嵯峨
清洛西風咽逝波
水色山光渾似舊

宋家陵墓夕陽多

函谷關

嬴秦烈焰掩全齊
誰遣君侯更向西
關上月明關下路
英雄千古怨晨雞

登平陸城樓

獨倚危樓日向西
洪河風起浪高低
中條北去無多路
回首鄉關路不迷

山水小景

湖水茫茫浪拍天
春風湖上有人煙
小樓半在花林內
簾捲青山看釣船

七夕

身世浮雲無定迹
客中二十四回秋
故鄉此夕逢佳節
閒看星河徹夜流

留別諸友

留連冉冉已過夏
離別匆匆又值秋
酒盡玉壺歌舞散
月明千里照汾流

又

錦瑟銀箏酒半酣
離情幾許舊曾諳
却憐後夜相思處
三晉山高月正南

元夕寄故鄉諸友

思鄉無日不關情
况復春燈對月明
欲作家書附回使
歸心先過洛陽城

過賈魯宅

今為長平驛

長平驛是相君家
不見當時富貴花
只有蒼蒼喬木在

至今猶宿夕陽鴉

滎陽道中

老親官定覃懷後
遊子南來京索時
舟渡濁河高處望
太行秋碧繞天涯

獨尋危坂出高岡
蔓草荆榛古道荒
谷口人家似仙館
幾間茅屋蔭垂楊

宮前老柏

蒼蒼老幹鑄青銅
縷縷香毛引細風
自是栽培年歲久

托根長近禹王宮

后土祠

一木為橋度斷溪
山風水氣冷淒淒
千年古廟蒼崖下
萬里河流正在西

石龕

古屋縱橫半畝餘
只疑神鬼護陰虛
蒼崖直上通元氣
點點寒泉滴露珠

題四景

雲滿青山水滿溪
綠楊紅杏繞幽栖
抱琴童子隨師去
歸到橋心日未西

水心亭子四山青
亭下荷花照眼明
我欲喚船楊柳岾
隔溪終日不聞聲

題錢舜舉山水小景

琪樹秋風生早寒
樓臺縹緲暮雲間
橋頭有客長無事
閒聽溪聲靜看山

新鄭學宮夜宿

清飈撼撼響林柯
夜宿秋堂冷簟波
睡醒不禁鄉思切
滿庭明月候蟲多

劉廣文携酒餞行

先人館下老門生
三十年来故舊情
今日相逢頭已白
殷勤載酒問歸程

出漢口

扁舟泛泛野湖平
岼轉奔流近漢城
滿目江山如畫裏
留題多少舊才名

公安詠古

古砌長衢滿綠苔
疎籬多傍水邊栽
欲知何處懷平仲
老竹荒祠風雨來

蜀江水漲如黃河
江北諸山彷彿太行
遣興而作

蜀江濁比大河黃
江北諸山似太行
誤喜中原應不遠
忽聞人語是湖襄

常德

金史卷之五十七
卷三百六十七
百里平川古朗州沅江滾滾向東流竹枝留得唐人句
一曲西風碧樹秋

益陽山行遇雨

雲林漠漠雨淒淒曲曲危橋曲曲溪可是青驄行處穩
滿山紅葉襯秋泥

黔陽春日

滿庭落葉似深秋好鳥鳴時地轉幽坐對青山纔咫尺
會登高頂望中州

駐節黔中改歲華
四山重疊繞天涯
空庭獨坐聽鳴鳥
拂面春風吹柳花

四月望夜院中作

月照芭蕉葉上明
小欄干外竹林清
一襟風露涼如洗
似有新秋在戶庭

對雨遣興柬陳侍御

秋雨通宵盡日鳴
柏臺雙沼漲皆平
綠荷裊裊歌香柄
細看明珠瀉未停

靖州月夜

參差林影受風斜
堅坐胡牀愛月華
涼露在庭清似水
不知今夕是天涯

竹

三年烏府長琅玕
粉籜新梢次第看
今日成林足風雨
坐聽清響徹雲端

梅

紅白沅州有二梅
年年長是近春開
飄廊點砌今誰借

祇有東風掃石苔

再懷沅州五友

簾捲秋風繞砌花
沅陽幾對昔年華
關山白露三千里
誰采金英泛紫霞

汾上春行

清汾信馬踏春酣
汀草萋萋隴麥穠
正是暖風啼鳥日
水村花塢似江南

聞蛙有懷

春晚乘驄駐德平
古城牆外有蛙鳴
却思青草池塘夜
三載湖南厭此聲

暮春道中見桃花尚開

馬穿新綠過園林
已恨穠芳誤賞心
猶有小桃花未落
獨留餘艷到春深

穆陵關夜雨

萬山絕頂穆陵關
一上山樓五月寒
煙樹滿村浮暝色
晚風吹雨濕欄干

竹塢涼風

半畝琅玕出短墉
煖煙輕霧碧陰重
開門淨掃蒼苔坐
細葉蕭蕭引好風

行臺雜詠

繞屋葵花錦作圍
畫牆墻外柳依依
日長庭院遊絲靜
乳燕穿簾自在飛

四景為李通政賦

石橋流水自東西
綠樹連雲翠嶂低
却憶當年持憲節

扁舟曾泛武陵溪

臨波春意

蒼玉生苔浸綠波
新篁老木散枝柯
徒勞人世歌招隱
淡蕩東風野興多

淡靄涼生

扁舟幾度泛湘波
老木疎篁翠石多
涼吹淡煙圖畫裏
遠懷清絕奈秋何

絕句

長江風起浪如山
驛路紅塵幾往還
三十年前回首處
煙簑依舊釣磯閒

汾上春日

道邊桃李綠陰繁
花落難招萬片魂
只有清汾流不盡
年年長是繞孤村

朝天驛

征驂行盡襄南路
又上朝天驛畔舟
兩岬雲林青未了
嘉陵南去水悠悠

蜀竹枝歌

錦官城東多水樓
蜀姬酒濃消客愁
醉來忘却家山道
勸君莫作錦城遊

其二

江上小樓開戶多
蜀儂解唱巴渝歌
清江中夜月如畫
賈客樓頭奈樂何

其三

楊柳曨曨天欲明
錦江夜雨江水生
鹽船無數惡年少

閒上江樓看曉晴



石倉歷代詩選卷三百六十七

欽定四庫全書

集部

石倉歷代詩選卷三百六十八

九

評校官編修臣謝振定

侍讀臣孫球覆勘

總校官進士臣朱

鈐

校對官編修臣郭

晉

謄錄監生臣李傳燮

燮

欽定四庫全書

石倉歷代詩選卷三百六十八

明 曹學佺 編

明詩次集二

于謙

擬古

妾意如冰清妾心如石堅
良人久別離悵望空懸懸
所感恩義重豈為情欲牽
但願良人好功名遂超遷
九重

布恩澤四境無烽煙未卜會面期先遣佳音傳亦足慰
岑寂何必常團圓

南國有佳人

南國有佳人皎皎冰雪姿恒恐污潔白臙粉弗敢施奉
身事君子服勤忘燕私一朝成遠別千里長相思願託
雙飛翼辛苦良不辭飛來侍君側恩義兩無虧永言執
箕帚盡瘁以為期可望不可即翹首空嗟咨

處世若醉夢

處世若醉夢憂樂付等閒
百事皆前定對酒且自寬
仰天歌嗚嗚清風吹我冠
濁醪滿瓦缶首肯堆春盤
無人勸我飲自酌還自歡
醉眠白日晚起看明月團
拔劍舞中庭浩歌振林巒
丈夫意如此不學腐儒酸

清明感興

宦遊無定踪飄飄任南北
今年在并州邂逅過寒食
花枝紅欲燃草色翠如織
羣鳥鳴閒庭啾啾竟朝夕
飛絮隨東風輕盈粘几席
而我與春光相看俱是客
春歸已

有期我歸應未得對景不成歡喟然長太息太息復何
為揮毫題素壁

無題

人生不滿百常為千歲計圖利與求名昂昂急意氣晝
營夜復思顧恐力弗至一旦壽命終萬事皆委棄卓哉
陶靖節不為世故累解印歸柴桑清風滿天地樽中幸
有酒自酌還自醉借問寰中人誰能會此意

夜聞鶴唳有感

齋居無四隣庭空篆煙冷明月揚素輝脩篁散疎影雙
鶴向我鳴鼓翅復引領靈風振縞衣華露浥丹頂清響
徹雲霄萬籟悉以屏芝田在何許遙遙隔塵境欲去還
未能蹉跎駐光景聽此融心神令人發深省

題壁間畫

看山如看畫聽水如聽琴水流碧溪轉山高白雲深俯
仰天地間萬物本無心松風颯然來為我滌煩襟

遊春曲

垂楊拂地如青絲，輕盈不奈東風吹。馬上誰家游俠兒，
雕鞍玉勒黃金羈。張弓放彈如星馳，正中流鶯落樹枝。
衆中大笑稱絕竒，揚鞭走馬當路歧。忽聞鞦韆笑語嬉，
隔牆竚立情如痴。牆裏佳人顰黛者，留情不語知伊誰。
分明相望不相知，恨無羽翼通佳期。夕陽啼鳥催分離，
可憐兩地空相思。

採桑婦

低樹採桑易，高樹採桑難。日出採桑去，日暮採桑還。歸

來喂葉上蠶箔誰問花開與花落二眠纔起近三眠此
際祇愁風雨惡割雞裂紙祀蠶神蠶若成時忘苦辛但
願公家租賦給一絲不望上儂身丁男幸免官府責脂
粉何須着顏色收蠶猶未是閒時却共兒夫勤稼穡

採蓮曲

朝採蓮暮採蓮蓮花豔冶蓮葉鮮花好面顏不常好葉
似羅裙怨秋早秋風浩蕩吹碧波綠怨紅愁將奈何年
年採蓮逞顏色採得蓮花竟何益蓮花雖好却無情夫

金步...
卷三百六十八
一
壻有情常是客萬里關河歸未得爭如池上錦鴛鴦雙
去雙來到頭白

折楊柳

折楊柳折得柔條持在手殷勤贈與遠行人人去書來
莫厭頻明年柳發黃金芽却望歸轅早到家春來春去
須臾事莫待漫天飛雪花折楊柳愁思多短長亭畔崎
嶇路送盡行人奈爾何

靜夜思

靜夜思何時休終宵展轉聽更籌人生由來不滿百安
得朝夕事隱憂功名富貴儻來物目前渺渺春雲浮甲
第歌鐘萬戶侯五花驄馬千金裘春風秋月不相待倏
忽朱顏變白頭豪華一去難再得壯氣銷沈土一丘但
令名節不墜地身外區區安用求靜夜思誰與謀勸君
高枕且熟睡窮達由天不用愁

北風吹

北風吹吹我庭前柏樹枝樹堅不怕風吹動節操稜稜

還自持冰霜歷盡心不移
况復陽和景漸宜
閒花野草尚葳蕤
風吹柏樹將何為
北風吹能幾時

眼前花

昨日看花開
今朝看花落
花開花落兩無情
莫怪夜來風雨惡
人生一似雨中花
老少須臾莫怨嗟
昨日朱顏生綠醕
今朝白髮映烏紗
看花對酒寧辭醉
醉醒後還投賣酒家
君不見眼前花

獨酌

東風昨夜吹芳草綠漸成陰紅漸老庭前無數落來花
分付家童莫輕掃開樽獨酌向花前仰面歌呼聲徹天
花殘自有重開日人老何由更少年醉看明月照華顛
還把落花鋪地眠牀頭貯酒三百斛囊底蕭條無一錢
看花對酒且自樂一任春歸啼杜鵑

馬上郎

馬上郎青春好玉勒金羈映芳草芳草茸茸襯落花花
間亭館知誰家郎君下馬入門去紅裯翠袖留春住留

春住可奈何笑指生香歡愛多烏雲高髻鬱嵯峨樽前
起舞影婆娑酒酣漸覺朱顏酡留情兩眼橫秋波橫秋
波情密密閭閻凍君不知夫妻對面厨中泣

閨思

東風蕩漾吹花柳春色醺人如醉酒梁間喜見燕將雛
檻外忽聞鶯喚友綠窗倦繡且停針搔首沈吟意轉深
却喚侍兒開繡戶輕移蓮步傍花陰花陰滿地蝶雙飛
相隨戀戀紅薔薇欲向花間撲雙蝶生憎綠刺牽人衣

歸來長歎臨粧鏡宛轉柔情還未定還未定誰得知須
史鴉噪庭槐晚又是深閨拜月時

夏日憶故鄉風景

石榴樹底紅巾蹙
簷蔔枝頭露香玉
薰風拂拂自南來
時向高堂埽炎燠
紅綃煥爛蜀葵開
金彈纒垂盧橘熟
端陽佳節競繁華
黍角堆盤映醺醖
一從遊宦隔天涯
馬首紅塵厭驅逐
有時飛夢繞錢塘
此景依然在心目
今年夏月居晉陽
南北風土殊炎涼
清和已過近五月

草木猶自愁飛霜故園物候不可見塵沙塞草空茫茫
雲山望斷幾千里小樓盡日空徜徉

春寒病中自慰

別離驚歲換老病怯春寒脫幘擁衾卧移書就枕看暗
將歸計卜聊把客懷寬早晚金臺路東風拂繡鞍

絳州分司設興

高居遠塵世嘉木結繁陰葉密藏山果池清立水禽簾
垂花隔戶石迸笋穿林鎮日看書坐脩然解俗襟

回朝偶題

老去驚時換，公餘覺晝長。
池風荷偃翠，林雨杏垂黃。
舊業存書卷，閒情付藥方。
偶來北窗下，高枕夢羲皇。

到澤州

信馬天將暮，離山路轉平。
川紫太行驛，樹繞澤州城。
落日翻旗影，長風送鼓聲。
孤雲在天際，回首若為情。

題古寺

古寺知何代，荒涼倚翠微。
凝塵生佛面，落葉擁禪扉。
殿

金人詩話卷之二十一
卷三百六十八
迴香燈寂廊空鳥鵲飛塔鈴風外語應似怨斜暉

遊春

滿路香塵起尋春思欲迷樹晴鶯出谷溪暖燕銜泥玉
勒嘶芳草青樓瞰大堤風光無限好都在畫橋西

連日大風至十八日午後乃止喜賦

狂風當午歇庭戶絕纖塵落葉粘芳草遊絲挽暮春間
闌鶯語滑來往燕飛頻縱是韶光晚相看亦向人

日晚至文水

溪明寒日落樹暝夕煙生飛鳥隨人語長風撼樹聲鼓
笳悲遠戍車馬厭脩程騎火前村起山城候吏迎

春日大風感懷

遠塞足風沙春深不見花層冰猶度馬弱柳未藏鴉易
醉愁邊酒頻歸夢裏家凭欄一搔首心緒亂如麻

春日客中謾興

客懷雖寂莫春意自堪憐草色翠如織花枝紅欲燃鳴
鳩疎雨後啼鳩暖風前翹首天涯路韶光又一年

山行

望極羣峰遠行穿一徑幽雲從樹杪起水遶竹根流酒
柿搖村舍鐘聲出寺樓多情林外鳥巧語答鳴騶

暮春後歸興

雨洗乾坤淨羣峰露翠微水清魚見遠花謝蝶還稀寒
落驚春暮蹉跎與願違耳邊山鳥語勸我不如歸

漫題屋壁

卜得幽居好秋來景倍嘉堂虛先得月城近每聞笳雨

洗蒼梧葉風吹白藕花門前無列戟寧異野人家

秋夜歸興

華月行空流素光星辰隱隱動寒芒
煙銷寶篆金爐冷水咽銅壺玉漏長
望斷鄉書無過雁牽成離恨有啼螿
敝廬只在吳江上蓴菜鱸魚入夢香

春日客懷

年年馬上見春風
花落花開醉夢中
短髮經梳千縷白
衰顏借酒一時紅
離家自是尋常事
報國慚無尺寸功

金日八
卷三百六十八
蕭澗行囊君莫笑獨留長劍倚青空

登樓書興

公暇登樓立彩旃客懷撫景倍淒然
千家綠樹蒼煙外
數點青山落照邊
暮景侵尋欺病骨
秋霜容易上華顛
自知不是經綸手
附郭須營二頃田

除夕夜坐感懷

秉燭焚香坐不眠
夜長難到五更天
懷人此際隔千里
為客明朝是十年
遠道風霜嗟老矣
故園梅柳想依然

椒盤獻歲知誰共，獨把金杯對影傳。

送吳繡衣還朝

平明走馬入京畿，楊柳飛花點繡衣。
山外有山頻入望，客中送客轉思歸。
紅雲高拱天門邃，綠樹深藏驛路微。
渡却黃河知己少，臨歧盃酒莫相違。

過五攢山

五攢山下路盤旋，曲阜崇岡遠接連。
十里郵亭數椽屋，幾家村落一坵田。
林梢日沒僧歸寺，澗底冰消鹿飲泉。

金步 卷三百六十八
詩思多從鞍馬得驂騑不用苦加鞭

盤陀驛道中

羣峰盡處是盤陀小徑紆迴亂石多風約閒雲難作雨
渠分流水不成河村經野店羣雞唱花發春山百鳥歌
一段好懷無著處令人對景費吟哦

憶晉祠風景且以致望雨之意

懸甕山前境趣幽邑人云是小瀛洲羣峰環聳青螺髻
合澗中分碧玉流出洞神龍和霧起凌波仙女弄珠遊

願將一掬靈祠水散作甘霖遍九州

夜宿山館書懷

蕭然山館似僧房三尺寒檠一炷香
風捲松濤清入夢窗涵月色冷侵牀
倦來不覺良宵短明發從教去路長
但願兩藩民物阜官中忘却是他鄉

天門山

天門山峙近西偏屹立芙蓉翠插天
六月岡巒飛雨雪四時林木吐雲煙
鳥飛不過巖頭石人渴難尋澗底泉

安得六丁施斧鑿滔滔車馬信平川

落花

半隨流水半隨塵
斷送韶光惱殺人
蜂蝶有情悲寂寞
園林無處見精神
眼前紅雨飄零盡
階下蒼苔點綴新
分付家童莫輕掃
醉眠還勝錦為茵

飛絮

飄飄隨意點輕裘
播蕩春風不自由
亂逐紅塵迷客路
輕隨綵燕入歌樓
梁園飛雪驚春夢
渭水斜陽送客愁

莫向樽前苦惆悵
綠陰還在粉牆頭

交城道中

峰巒重疊樹微茫
回首清源道路長
僧屋數椽臨野水
人家一半住山鄉
龍歸洞口雲煙濕
麝過林間草木香
隨處停驂問民俗
不知歸鳥背斜陽

水村

茅屋三椽傍淺沙
門前蒲柳綠交加
鳧鷖並宿藏荷葉
蛺蝶雙飛繞菜花
甘雨一犁滋穀麥
輕煙數里接桑麻

晚風天際孤帆客
艤棹來尋賣酒家

見白髮偶題

世間白髮最無情
纔近中年次第生
碌碌俄驚四十載
蕭蕭初見兩三莖
黃花晚節依然好
金液還丹豈易成
貪得由來戒遲暮
何須辛苦事功名

夏日即事

密密榆槐散綠雲
蕭蕭庭館絕纖塵
林鶯巧語如留客
梁燕低飛不避人
歲月無情催暮景
江湖何處是通津

數莖白髮籠紗帽深愧淵明漉酒中

太原道中曉行

星稀月落曉風清猶聽雞聲報五更山勢平吞沙漠境
河流曲繞晉陽城天涯何處尋歸路野景無邊動客情
車騎縱橫皆故道寧須候吏遠逢迎

夏日即事

槐陰凝綠暗階墀雨後薰風拂面吹魚躍亂隨新長水
鳥啼爭占最高枝紗厨水簟難成夢羽扇綸巾漸及時

金史卷之八十八
卷三百六十八
南閭清夷無別事觀書最喜日遲遲

春寒憶家

碧紗窗外北風多鎮日輕寒可奈何歲月有情人自老
江山無故客重過桃花深院飄紅雨杜若芳洲泛綠波
謾說故園春景好不堪歸計又蹉跎

秋晚行山西道中

暮雲收盡雨初晴馬首關山路幾程落日旌旗迎使節
西風鼓角動邊城溪流清見行人影霜信寒催過雁聲

最喜田家生事足
村村笑語樂秋成

壁間畫瀟湘八景

煙寺微茫幾杵鐘
漁村斜映夕陽紅
平沙落雁迷殘靄
遠浦歸帆趁便風
山市微嵐孤嶼斷
江天欲雪暮雲同
洞庭月色瀟湘雨
想像陰晴似夢中

秋光

秋水無痕徹底清
秋山如畫更分明
雁鴻影裏雲連塞
砧杵聲中月滿城
映日丹楓輝錦樹
傲霜黃菊綻金英

不須頻上高樓望此景由來惱客情

秋峰

浮雲散盡雨初晴天際羣峰削不成萬朵芙蓉相掩映
九華仙掌自分明幽崖樹色經霜古絕頂松濤入夜驚
日夕南樓增爽氣可能相對豁吟情

秋鴻

相呼相喚過南樓叫破江南萬里秋有足不傳雲外信
無端偏惹客中愁影橫斜月天邊塞夢繞黃蘆雪覆洲

霄漢翱翔應有自生平不為稻粱謀

秋興

西風一夜動關山秋意蕭森入夢間雁陣不衝愁思斷
砧聲偏與客情關故園黃菊催歸興老圃丹楓映醉顏
脩竹苦遭窗外雨朝來也作淚痕斑

題李景昌竹間書舍圖

萬玉蕭森遶四簷坐來惟覺雨纖纖小窗展卷循環誦
古鼎焚香取次添爽籟隨風來淨几清陰和月度疎簾

應知此地藏修者早晚蜚聲不久淹

濟寧路傍古塚

伊人埋骨已多年三尺荒丘北路邊
野鳥淒涼啼落日石麟顛倒卧寒煙
良平計策今安在房杜功名亦偶然
弔古欲詢何代客斷碑零落總堪憐

梁園

自古梁園佳麗地于今寂莫減繁華
日長野店聞啼鳥春暮山城見落花
綠柳兩行侵洛遠黃河一帶入淮賒

欲將樽酒舒高興錦帳風流愧党家

病猿

鎖向虛廊不自由倦舒雙臂懶擡頭巴山夢斷霜華冷
梅嶺情牽樹影秋入定老僧心暫釋感時遷客淚初收
高門廣廈多豪富未必聞聲便有愁

晚坐窗下偶題

車聲軋軋近墻東雁陣翩翩信晚風籬角黃花疎雨後
樹頭紅葉夕陽中湖山舊業書連屋江海狂歌劍倚空

金瓶梅詞話卷一百六十八
可怪流年雙雪鬢相侵何事太匆匆

直廬歲暮

直廬蕭索度殘年靜夜焚香思悄然市遠不知沽酒價
庭空惟見煮茶煙風穿疎牖銀燈暗月轉高城玉漏傳
歸興漸隨生意動昨宵清夢遶林泉

惜春

無計留春住從教去復來明朝花正好只是老相催

偶題

薰風何處來吹我庭前樹啼鳥愛繁陰飛來不飛去

日暮

歸鴉爭遶樹落日半銜山微雨晚來歇孤雲獨自還

夏日散步庭下偶題

雨過苔痕淨庭空日影遲好懷誰會得啼鳥在花枝

舟中

遠道疲鞍馬舟行得暫閒推篷看風景祇見太行山

題金壁山水

溪山疎雨歇
水木散清陰
樵唱知何處
白雲深更深

井州北門城樓

塞北窮冬候無風也
自寒樓高窺朔漠
無事莫憑欄

春寒

遠山猶帶雪
淺水未生波
花柳無消息
春寒可奈何

秋意

溽暑隨風散
微涼趁雨生
蕭蕭樹頭葉
已解作秋聲

過滎陽

鴻溝迢遞接滎陽芳草瀰漫古戰場說盡興亡無限事
數聲啼鳥在垂楊

暮春遇雨

暖風吹雨浥輕塵滿地飛花斷送春莫上高樓凝望眼
天涯芳草正愁人

村舍桃花

野水縈紆石徑斜華門蓬戶兩三家短牆不解遮春意
露出緋桃半樹花

夜坐

朦朦淡月映窗紗
坐聽嚴城動鼓笳
自是歸期難准信
生憎銀燭又開花

七夕

鵲橋千丈跨銀河
夜靜風恬水不波
牛女相逢又相失
歡情不似別情多

雨中山行

濕雲拖雨過前山
遠樹冥冥煙霧間
碎石亂流人不渡

晚來惟一僧還

春歸

紅芳老盡綠陰肥到處楊花作雪飛
塞北從來無杜宇不知何物勸春歸

山行駐馬

霑衣數點雨餘雨極目萬重山
外山立馬平原看秋色獨憐寒菊映衰顏

上太行

西風落日草斑斑
雲薄秋空鳥獨還
兩鬢霜華千里客
馬蹄重上太行山

十七夜燈

一杯濁酒送殘燈
歲月無情感慨增
垂老漸忘兒女態
從教官况似山僧

春曉

曉風吹月下長空
漸覺東窗日影紅
寄語鄰雞莫驚覺
家山正在夢魂中

早春即景

弱柳千條拂地垂
向陽亭館日遲遲
杏花最得春光早
屋角斜橫四五枝

春日寫懷

賞心樂事久蹉跎
景物關情奈爾何
獨上樓臺望鄉國
一川芳草夕陽多

暮春小雨

霏霏小雨不霑衣
細逐斜風密又稀
好濕香塵沾柳絮

莫教零亂送春歸

宿徐溝

霜臺寂寂夜無譁
遠近邊城動鼓笳
客路瀰漫歸思遠
絳臺銀燭謾開花

暮春客途即景

雨中紅綻桃千樹
風外青搖柳萬條
借問春光誰管領
一雙蝴蝶過溪橋

淵明像

杖屨逍遙五柳旁
一辭獨擅晉文章
黃花本是無情物
也共先生晚節香

石倉歷代詩選卷三百六十八